

Date -03/10/2023

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Hnam Pa Mahatma Gandhi piancham puala buatsaih The Grand Gandhi Jayanti Exhibition chu Raj Bhavan tualah neih mek a ni.
2. Larsap Dr Hari Babu Kambhampati PM Vishwakarma chuan kutthemthiamna hmanga eizawng mek te tan kawng awlsam zawk a hawnsak a ti.
3. Central Bureau of Communication (CBC), Field office Aizawl chuan nimin khan Lengte ah sorkar laipui scheme hrang hrang zirtirna hun an buatsaih.

<><><>

GRAND EXHIBITION

Larsap Dr Hari Babu Kambhampati chuan nimin khan India Hnam Pa Mahatma Gandhi piancham puala buatsaih The Grand Gandhi Jayanti Exhibition, Raj Bhavan kawt tuala buatsaih chu a hawng.

Larsap chuan exhibition an buatsaih theih na'na tha thawhtute hnenah lawmthu sawiin Sawrkar laipuaia Ministry of Textiles in sumfaia tanpuina an pek avangin lawmthu a sawi a, vawiina exhibition an buatsaih chhan ber chu tualchhung thilsiam phochhuahna hun remchang a nih vang leh kut themthiam tak tak ten an thilsiam an zawrhchhuah ve theihna hun a nih thu a sawi a, Swadhesi Movement (mahni siamchhuah ngaih hlutna) inzirtirna atana pawimawh tak a ni tih a sawi.

Larsap chuan ram hmangaihna thinlung pu tur chuan mahni thilsiam ngaihsan leh dah hlut thiam a pawimawh a ti a, India hnam pa Mahatma Gandhi pawhin kut themthiamna leh thiamhnang dehna hmanrua atanga thilsiam chhuah te a ngai pawimawh thin tih sawiin heng hian mi tam tak tan eizawna a siam sak thei a ti a. Prime Minister Narendra Modi pawhin hemi hnungzui hian Atmanirbhar Bharat, Make in India, Vocal for Local rawn chhawpchhuakin hei hian mahni tharchhuah ngei hman tangkai thiam chu mi tin inzirtir kan mamawh takzet ani tih a sawi baw.

Larsap chuan Mizoram chhunga hmun hrang hrang a zinchhuah na ah theihna chi hrang nei tam tak an awm thu sawiin ramdang anga industry lian neilo mahse puantui leh puantah bakah eitur chi hrang hrang an siamchhuah te leh kut themthiamna te chu eizawna atana hman tlak tak leh rampawna hralh chhuah tlak siam chhuah theihna hmanrua a ni a ti a, hei hian mi tam tak tan eizawna a siamsak ngei a beisei tih a sawi baw.

Governor chuan tunhnaia Prime Minister in a hawn tak PM Vishwakarma chuan kutthemthiamna hmanga eizawng mekte tan kawng awlsam zawk hawnsak in chi hrang hrang 18 ah cheng nuai 3 thleng loan lak

theihin heng te hi bultanna tha tak ani a ti a, eizawna mumal tak hmuh theihna hmanrua a ni tih a sawi bawk.

Larsap chuan Mizo mipuite chu exhibition a an phochhuah mizo siam chhuah te chu ngaisang a, an thlawpzia lantir na'n an thil zawrhchhuah te leisak turin a sawm bawk.

Commerce and Industries Minister Dr R. Lalthangliana pawhin thu sawiin tunhnaiah Mizo siamchhuah thil tha tak tak hmuh tur awm chu lawmawm a tih thu sawiin an thilsiam chhuah te ram dang el phaka an tan leh zual theih nana tan la theuh turin a chah a, tunhnai kum 3 chhung velah nasa takin hmasawna a awm tih sawiin an thil siamchhuah te a tha tawh em em a, a man pawh tam mahse thilsiam a that phawt chuan mi te'n an lei duh zel tih sawiin ram pawna thawnchhuah tlak tha tak siam zel turin puantahtute a sawm bawk a ni.

Nimina exhibition buatsaih ah hian dawr chi hrang hrang 52 awmin mi 65 ten an thilsiam an phochhuah thei a. The Grand Gandhi Jayanti Exhibition hi a duh apiang tan luh man chawi ngai lovin tlawh theih a ni a, Nilaini October ni 4 thleng huaihawt tur niin nitin zing dar 10 atanga zan dar 7 thleng tlawh theih a ni dawn a ni.

<><><>

PM VISHWAKARMA

Larsap Dr Hari Babu Kambhampati chuan tunhnaia Prime Minister in a hawn tak PM Vishwakarma chuan kutthemthiamna hmanga eizawng mek te tan kawng awlsam zawk a hawsak a ti a, bultan tumte tan thil tha tak a ni tih a sawi bawk.

He thu hi nimina Gandhi Jayanti Exhibition a hawna-ah sawiin larsap chuan PM Vishwakarma kaltlangin eizawna chi hrang hrang 18 ah cheng nuai 3 thleng loan lak theihin heng te hi bultanna tha tak a ni a ti a, eizawna mumal tak hmuh theihna hmanrua ani tih a sawi bawk. Commerce and Industries Department Director Pi Florence Zotluangpuii sawi danin PM Vishwakarma chu hawn tawh ni mahse a taka hman tan turin inkaihhruaina a la rawn chhuaklo a, hmalak dan tur hi sawrkar laipui duan tur niin hemi zulzui hian state in an zawm dawn a, sawrkar laipuiin an siam veleh district hrang hrangah bultan tur a ni dawn a ni.

Director chuan Vishwakarma ah kuthnathawktu thiamna bik nei te in ziak lut zel turin an sawm tih a sawi a, PM Vishwakarma chuan kut themthiam hrang hrang te leh thiridengte a huam tel tih sawiin a inziak lutte tanpui na'n cheng nuai 3 thleng tanpuina loan lak theih a ni a ti a. An hnathawhte eizawna atana an hman ngei theih na'n he ruahmanna hian puiin an hralhna tur thlengin a pui dawn tih a sawi bawk.

Nimina Exhibition Raj Bhavan-a neihah hian PM Vishwakarma pualin dawr hawn a ni a, Lalchhuanmawia Ralte (LESDE Department) chuan Vishwakarma kaltlangin kuthnathawktute'n an hnathawhna lamah hma an sawn ang a, an eizawna ah hmasawn in a hralhchhuah kawngah pawh sawrkar laipui hian a buaipui vek dawn a ti a. Vawiina an phochhuah thil 5 te chu mizo ten hmanlai atanga hmanrua an lo neih tawh niin tunlai nunphungah pawh a pawimawhia pholan telna a ni bawk tih a sawi.



CLEANLINESS WEEK

India Hnampa Mahatma Gandhi piancham pualin Mizoram pumah Faina Hapta chu nimin khan district hrang hrangah kalpui tan a ni a, hemi rual hian Faina beihpui thlakna Swachhata Hi Seva chu khar a ni.

Aizawlah chuan nimin tuk khan Chief Secretary Dr. Renu Sharma hovin Aizawl District Level Cleanliness Week hawwna neih a ni a. Hemi pual hian bawrhsap pisa a thawkte leh Govt. Comprehensive Model School zirlaite'n bawrhsap pisa leh a chhehvel tifai-in an hnatlang a, Chief Secretary chuan faina leh thianghlimna chu mihring nun nawmna leh ram hmasawwna nen kal dun tlat anih thu leh sawrkar pawhin faina ngai pawimawhin, khawtlang nuam, ram nuam kan siam theih nan tiang hun te hi inhriathriatna hmanrua atan buatsaih a nih thu a sawi a. mahni leh midangte tan malsawmna nih tum zawk tur a ni, tiin zirlaite leh kalkhawm dangte chu a chah a ni.

Lunglei ah chuan Faina Hapta hi Lunglei Bawrhsap Pi Ramdinliani chuan khuallian niin a hawng a, Swachhata Hi Seva kalpui mekah Lunglei District chhunga thingtlang hmun 11-ah hnatlang huaihawt niin khawpui chhung hmun 6-ah an hnatlang tih sawiin faina lamah tunhma ngaihtuahin hmasawn mahse theihtawp chhuah zela thangthar zawk ten faina lam rilru pu thar turin a duh tih a sawi baw.

Siaha ah chuan nimin tuk khan Bawrhsap Pu Lalhmunsanga Hnamte kaihhruai-in hman a ni a, bawrhsap chuan Swachhata hi Seva hlawhtling taka hman a nih theihna tura thawktu zawng zawngte inpekna fakawm a tih thu tarlangin Siaha mipuiten Faina Hapta chu hlawk taka hmanga inthlahdah mai lova faina lama hmasawn zel turin kum tin a thar a tanlak zel a pawimawh tih a sawi.

Kolasib-ah chuan Faina Hapta hi Bawrhsap Pu John LT Sanga chuan hawngin mi ropui apiangin faina an ngai pawimawh a, ram changkang apiang an fai thin, a ti a. Kolasib District chu State kawtchhuah a nih angin ram hmel lanna a ni a, pawn lam atanga lo kalte leh District danga mite tan pawha faina kawnga entawn tlak ni tura tan lak a tul tih sawiin Kolasib District mipuite chu faina kawnga theih tawp chhuah zel turin a sawm baw.

Serchhip district-ah chuan khawpui chhung leh thingtlangah pawh hma lak mek niin, Serchhip khawpui chung VC thenkhatte chuan kar liamta Inrinni khan Faina hnatlang hi an lo tawh a, nimin lamah khawpui chung VC thenkhatte'n Faina hnatlang hi ko ve lehin, Chhungkaw tin atangin mi pakhat zel an thawk chhuak a ni.

Lawngtlai ah chuan Faina Hapta hi DC pisa tualah hawn niin NSS, Government Region Higher Secondary School zirlaite he hun ah hian an tel a, Khuallian LADC a Executive Member Pu C. Rongura, chuan fai chu mahni theuh atanga intan tur a nih thu leh fai duhna chu kan nunphung a bet tlat tur a nih thu a sawi a. Fai leh thianghlimna ngaina mi ni tur chuan ruihtheih thil, zuk leh hmuam lakah taksa vawn thianghlim a pawimawh thu a sawi.

Mamit ah chuan DC Pu VL Remliama hovin DC Complex ah hman niin DC chuan Faina chu chhungkua a tanga tan ngai a ni a, chu chuan khawtlang

fai leh ram fai a thlen dawn a, kan balh viau chuan kan la changkang tawklo a ni a ti. Mamit District mipuite faina kawngah midangte entawn tlak ni tura tan lak a tul thu a sawi bawk.

<><><>

POLITICAL VOLTE-FACE

Chakma Autonomous District Council (CADC) CEM Rasik Mohan Chakma leh MDC dang 17-te chuan MNF chhuahsanin ZPM a luh a CADC-ah pawh MNF namthlu a ZPM sorkar siam an tum lai mekin an rilru an thlak leh thut a, MNF an vuan leh ta ni a hriat a ni.

Chief Minister leh MNF president Pu Zoramthanga chuan social media a twitter account an tih thin, X an tih tak, hmangin nimin chawhnu khan he thu hi a puang a. Pu Zoramthanga chuan Rasik Mohan Chakma leh CADC a MDC-te MNF party a rinna an nghah thar leh avangin lawmthu a hrih a. MNF a rinna an nghah thar leh chhan hi thil ropui tak a ni a ti a. MNF party mite zawng zawngin an lo lawm thu leh an hun lo awm zel tura a duhsakna a hlan bawk a ni. Rasik Mohan Chakma leh amah zuitu MDC-te hian September ni 29 khan Chakma District MNF President hnenah MNF party a an nihna chelh theuh leh party member an nihna atanga an ban thu an hming ziak hnanin an pe a. MNF general headquarters President hnenah a copy an pe bawk a.

Hei bakah hian CADC-a MNF sorkar namthlu a ZPM sorkar din an tum thu hi an puang bawk a. Pathianni thleng kha chu chu an dinhmun a ni a, nimin lamah thil a inthlakthleng ta thut niin a lang a. A lungawi loh chhan ber Tuichawng biala MNF candidate atana midang an ruat chungchang chu engtin nge MNF party hotute'n an chinfel tih tun dinhmunah hriat theih a la ni lo.

<><><>

CBC

Sorkar laipui Ministry of Information and Broadcasting hnuuia Central Bureau of Communication (CBC), Field office Aizawl chuan nimin khan Lengte ah mipui zirtirna huaihawtin, Swachhata Hi Seva, 9'years Of Seva, Sushasan & Garib Kalyan, G20 & Vigilance Awareness te an zirtir a ni.

CBC Field office In Charge Lalginlen Lhouvum chuan heng central sorkar cheme hrang hrangte hi a sawi fiah a, he hunah hian Lengte VCP Pu Lalrinchhana chuan faina beihpui thlakin state chung hmel a tidanglam pha hle ni a a hriat thu a sawi a ni.

<><><>